

Sier Zuan Vituri.

Sier Francesco da Pexaro qu. sier Marco.

270ⁿ *A dì 19.* La matina. Se intese esser morto eri sera il Canzelior grandino Francesco Fazuol dottor, qual è zercha anni 4 fo eletto Canzelior grandino, era prima avvocato a li Consegli, a di 29 Marzo 1511: di età di anni 54, non ha fioli nè moglie, ma do nepoti et una neza. Et fo sonato per la terza le campane, et si farà le exequie Mercore, justa il solito; il corpo sarà portado a San Zuminian doman, et le exequie si farà a San Stefano, vi anderà la Signoria.

Et in Colegio fo parlato tra il Principe e Consieri zercha fare ditto Canzelior, perchè alcuni di fuora di la Canzelaria voleano esser nominati, *unde* il Principe disse era mal non far di la Canzelaria. Et lo era in Colegio, et aiutai questa opinion dil Principe, comemorando li Canzelieri antiqui eleti, come noterò qui soto, *adeo* li Consieri terminono non tuor di quelli fuora di Canzelaria. Erano questi di fuora che praticavano esser nominadi, *tamen* niun meritavano esser:

Facio Tomasini di Canaregio.

Zuan Gueruzi fo di Pietro *dal Banco*, gastaldo a li Procuratori.

Vetor Ziliol, scrivan a la Camera d'imprestedi.

Alvise Finati, Canzelior grandino in Candia.

Nicolò Da Ponte dai Servi; et el Gueruzi havia gran parte.

Tamen, questi secretari comenzono a praticar li zentilhomeni, *videlicet* Thomà di Freschi, Gasparo di la Vedoa, Alberto Tealdini, Nicolò Aurelio, Zuan Piero Stela et Alexandro Capella et Zuan Batista di Adriani. Sono 7, *tamen solum* 6 poleno esser balotadi, zoè nominati per li Consieri al Gran Consejo, *tamen* non si trova parte di far Canzelior grandino in Canzelaria, perchè le scritture antique si brusoe quando si brusò el Palazzo anticamente. Resta uno altro nel numero di secretari, qual è degnissima persona, Bernadin di Redaldi, et non fu alcuna pratica.

Fo lete in Colegio le lettere venute eri sera di campo.

Di Bergamo, di rectori. Come haveano mandato al provedador Griti ducati 3500, sicome ho scritto di sopra.

Vene in Colegio il cavalier di la Volpe, era Governador in Friul, fato preson de i nimici, vien di Gradisca, ha lassato per lui suo fradelo Cesare et

piezaria di ducati 1000 di ritornar, ovvero segue il contracambio fato per lui dil capitano Renier, qual li fo dato per Colgio e cavato de li Cabioni con segurtà et stia in Fontego di Todeschi; et parloe zercha la sua captura. Fo commesso a li Savi.

Fo parlato, atento si pol dir aver Verona, qual ozi dia esser tutta in le man nostre, di proveder e far rectori, *etiam* scontar la spesa di fantarie et parte di le zente d'arme, e fo terminato in Colegio di redursi ozi tutti per tratar questo.

Item, eri fo scritto per Colegio a Padoa, Treviso Vicenza e Udene, avisino li provisionati a quelle Camere. *Item*, li ducati d'oro che si toleano per lir. 6 pizoli 10, si toy per 6, 4, e cussi le altre monede si toy per quello valevano avanti la guerra.

Da poi disnar, fo Colegio di la Signoria e Savii. 270^{*} Et è da saper, che intendendo Gasparo di la Vedoa, secretario nostro più vecchio nel Consejo di X, che non era nominato da li 6 Consieri in Canzelior grandino perchè haveano promesso di tuor li altri, vene in Colegio et parloe longamente di le fatiche patite, et si 'l non fusse nominato, li saria grandissima vergogna oltra il danno, *unde* fo terminà per la Signoria doman balotar tutti quelli di la Canzelaria che vorano far in Colegio fra loro Consieri, et di tutti ne escano 6 da esser poi balotadi in Gran Consejo; e questa è cosa nova.

Questi sono li Canzelieri si trova esser stadi per i libri di Canzelaria.

1281 a di 20 Marzo, missier Tanto fo eleto.

1323 a di 12 Fevver, missier Nicolò Pistorino.

1352 a di primo Luio, missier Rafael di Caresini il qual dil 1381 fo assumpto al Mazor Consejo.

1390 a di 11 Septembrio, missier Piero di Rossi, di XL.

1394 a di 10 Zener, missier Desiderato Lutio.

1396 a di 23 April, missier Zuan Vido.

1412 a di 22 Lujo, missier Zuan Piumazo.

1428 a di 24 Zugno, missier Francesco Bevazan.

1439 a di 8 Novembrio, missier Francesco da la Siega.

1470 a di 19 Avosto, missier Alexandro da le Fornaxe.

1480 a di 20 Mazo, missier Phebus Capella.

1482 a di 11 Mazo, missier Zuan Dedo.

(1) La carta 269* è bianca.